

**CONCELLO DE
SANTIAGO**

DECLARACIÓN INSTITUCIONAL DA CORPORACIÓN DE MUNICIPAL DE SANTIAGO DE COMPOSTELA


O artigo 24 da Constitución establece o dereito que teñen todas as persoas á tutela efectiva dos xuíces e tribunais para a defensa dos seus dereitos e intereses lexítimos.

A vixente Lei Orgánica do Poder Xudicial aprobada en 1985 sufriu preto de 40 modificacións, nun proceso inconcluso de adaptación das estruturas da Xustiza á realidade económica, social e xurídica do século XXI.

O pasado día 4 de abril foi aprobado polo Consello de Ministros o anteproxecto de Lei Orgánica do Poder Xudicial (LOPX). Este anteproxecto da LOPX configura unha organización xudicial que ten por base os Tribunais Provinciais de Instancia, órganos que coa devandita base territorial agruparán aos actuais xulgados calquera que sexa a súa orde xurisdiccional. Esta distribución provincial vai condicionar o acceso á xustiza da cidadanía, provocando un maior distanciamento dos órganos xudiciais e incrementando as cargas a soportar polos administrados na súa relación coa xustiza.

A Corporación de Santiago de Compostela considera que a demarcación dos Tribunais de Instancia establecida así cun ámbito provincial sería moi perxudicial para Santiago de Compostela e para o conxunto de Galicia, e que, polo contrario, debería ter en conta as particularidades e especificidades propias de Santiago como Capital de Galicia e cabeceira actual dun partido xudicial que ten unha carga de traballo considerable, e conta con seis xulgados de Primeira Instancia, tres de Instrucción, tres do Social, dous do Contencioso-Administrativo, dous do Penal, unha sección da Audiencia Provincial, o IMELGA e unha Fiscalía de Área. Presta ademais servizos non só á cidade, senon tamén aos concellos da comarca, e supón un importante dinamizador económico de Compostela.

A proposta do Anteproxecto de LOPX obvia que foi a practicidade no exercicio da xurisdición e o volume de asuntos existente, o que provocou que a estrutura estritamente provincial, inicialmente prevista na actual LOPX, fose abandonada nalgunhas cidades españolas, entre as que se atopa Santiago de Compostela, dada a necesidade de favorecer o encardinamento de institucións reguladas inicialmente como provinciais (Imelga, Fiscalía, xulgados do contencioso-administrativo, do penal e do social, e seccións da Audiencia Provincial), e que son hoxe institucións xa consolidadas. En consecuencia, a supresión desta



CONCELLO DE SANTIAGO

estrutura, que responde á evolución lóxica da organización da Xustiza, derivada das propias circunstancias socio-económicas do noso territorio, supón un retroceso que descoñece a necesidade revelada nos últimos anos de que determinados ámbitos xeográficos galegos se constitúan como un centro de referencia na organización xudicial, cunha organización estable.

Trasladar fóra da actual sede os órganos xa existentes, limitará a súa funcionalidade e prexudicará a efectividade do servizo. De tal forma que incluso a eliminación dalgún dos partidos xudiciais máis periféricos, necesariamente deberá comportar o incremento das sedes actuais de Santiago de Compostela, xa actualmente insuficientes.

Por todo ilo, a Corporación de Santiago, por unanimidade, **ACORDA:**

1. Instar ao Goberno Central para que o texto da nova Lei Orgánica do Poder Xudicial contemple o partido xudicial con Tribunal de Instancia para Santiago de Compostela, e que siga mantendo alomenos os servizos que ten na actualidade.
2. Que nos criterios que definan a futura planta xudicial no territorio galego, sexan tidos en conta os criterios relacionados coas características socioeconómicas, xeográficas e poboacionais, á hora de recoñecer como partido xudicial con Tribunal de instancia a estrutura existente na actualidade en Santiago de Compostela e noutras poboacións galegas.
3. Dar traslado deste Acordo ao Ministerio de Xustiza, á Consellería de Presidencia, Administracións Públicas e Xustiza da Xunta de Galicia, ao Tribunal Superior de Galicia, ao Consello Xeral do Poder Xudicial, ao Consello de Estado, ao Fiscal Xeral do Estado e ao Consello da Avogacía Galega.

Santiago de Compostela, 24 de abril de 2014.

O Portavoz do Grupo
Municipal do PP




María Pardo Valdés

O Portavoz do Grupo
Municipal do PSdeG-PSOE



Francisco Reyes Santiás

O Portavoz do Grupo
Municipal de BNG



Rubén Cela Díaz